

Cornelies van den Broek di compania 'We Build'

“Nos lo desmantela y recoge asbest bou guia di DTI y Salubridad Publico”

CONTRATISTA We Build cu a gana e trabou pa desmantela Bushiri Hotel tin 55 dia pa haci e trabou aki. Esaki a bini dilanti durante un conferencia di prensa cu Gobierno a tene diaranson mainta na ex Bushiri Hotel.

Segun por a compronde for di sr. van den Broek, a tarda pa yega pa cuminsa cu e trabou pa motibo cu DTI mester a haci un evaluacion di henter e compleho, cual ta tur e materialnan cu tin presente. Pero tambe mester a señala cuanto material di asbest tin, unda nan ta y con ta e miho forma pa deshaci di nan. Tin en total 7000 M2 di material cu ta contene asbest, di cual 5500 m2 ta rib'e dak y otronan ta na suela of den e edificio (linoleum).

Durante e conferencia di prensa den forma simbolico a basha un muraya abou, cu ta señal di inicio di e trabounan pa desmantela e ex hotel. El a bisa cu no ta prome biaha cu nan ta involvi den trabounan unda cu tin material di asbest y semper a traha y lo sigui traha segun e reglanan cu ta wordo poni dor di DTI. El a splica cu e saconan den cual e material di asbest ta wordo transporta ta bini di Hulanda y ta aproba pa uza cu e material aki dor di autoridadnan Hulandes. “Esaki ta hopi importante pa nos”, van den Broek a bisa.

Nan prome proyecto na Aruba tabata na Abraham de Veer School unda cu a deshaci di 2400 m2 di material di asbest.

E contractista a splica cu e material di fundeshi y otro material di bloki ta wordo recicla y esaki na su turno ta bay wordo uza pa yena tereno, den construccion di caminda of traha beton.

E material di hero ta wordo bendi. E tereno na final ta cla ta keda sin nada di beton, y solamente e matanan ta keda intacto. Mirando e cantidad di dianan cu nan tin pa haci e trabou, mester scoge un grupo grandi di traha of uza makinaria grandi principalmente. E ta opta pa e ultimo opcion pa logra cumpli cu tur e exigencianan den e tempo stipula.

Director di DOW ing. Marlon Croes tambe a splica cu durante e trabou, e area lo wordo cera cu heki y lo tin un plan di salud cu ta bay wordo uza na momento cu yega pa basha e parti di asbest y e forma con lo transporta esaki na e area unda e lo wordo deposita na e dump oficial.

Pa esaki tambe tin un protocol con ta deshaci di dje.

